

長白岐東氏豐

捐廉修輯

靈州志

嘉慶戊午季冬

靈武二孝贊

唐李華

靈武二孝曰侯知道程俱羅目不觀朝廷之容耳  
不聞韶夏之聲不登齊魯之境所見戎馬旃裘叅  
於夷狄而能生養以孝沒奉以哀穿壙起墳出於  
身力鄉人助之者哭而反之廬於塚次號泣無節  
侯氏七年矣程氏二年矣根於天性陶我孝理其  
至矣乎埃垢積首草生髮間每大漠晨空連山夜  
寂人煙四絕虎豹與隣擁墳椎膺聲氣咽塞下入

九泉上徹九天背爛心朽皮枯節攣草木先秋而  
凋落景氣不時而凝閉殊鳥異獸助之悲號萬物  
有極此哀無窮大哉二子能以孝終始乎語曰孝  
如曾參不忍離其親生既不忍歿忍離之哉二子  
之孝過於曾參矣昔吳起忍與母盟陳湯忍匿父  
喪起謀復楚霸而戮死湯功釋漢耻而囚廢神道  
昭昭若何無報九州之衆誰非人子踐霜露者聞  
風永懷士有感一諾一顧猶或與之死生喜一草  
一木猶或為之歌詠而况百行之宗終天之感乎

華奉使朔陲欲親往弔焉屬河凌絕渡願言不果  
憑軾隔川寄聲二孝同為贊一章敢旌善人以附  
惇史其文曰厥初生人有君有親孝於親者為子  
忠於君者為臣兆自天命降及人倫背死不義忘  
生不仁愚及智為就之禮文禮文不能節其哀繫  
道德之元純至哉侯氏創鉅病殷手足胼胝成此  
高墳蔬果為奠茅蒲為茵其奉也敬其生也貧大  
漠黃沙空山白雲柏庭既夕松路未晨寇戎接境  
豺狼成群夜黑飈動如臨鬼神哭無常聲迥徹蒼  
旻風雨飄搖支體鱗皴色慘莪蒿聲酸棘薪苴斬  
三年而獨終身邑子程生其哀也均顧後絕配瞻  
前無隣冬十一月河水寒津吾將弔之其路無因  
寄誠斯文揮涕河濱

河源記

元潘昂霄

河源在吐蕃朶甘思西鄙有泉百餘眼或潦水沮  
汝渙散方可七八十里且泥弱不勝人跡近觀弗  
克傍立高山下視燦若列星以故名火墩腦兒譯  
言星宿海也群流奔湍近五七里滙二巨澤名阿

刺腦兒自西徂東連厲吞噬廣輪馬行一日程迤  
遷東驚成川號赤賓河二三日程水西南來名亦  
里出合赤賓三四日程水南來名忽闌又水東南  
來名也里朮合流入赤賓其流漫大始名黃河然  
水清人可涉又一二日岐裂八九股名也孫幹論  
譯言九渡通廣六七里為亦可渡又四五日程水  
渾濁土人抱革囊為過之民聚部落糾集木幹  
象舟傳毛草以濟僅容兩人繼是兩山岐東廣可  
一里二里或半里深莫測矣朶甘思東北鄙有大  
雪山名亦耳麻不莫刺其山最高譯言騰乞里塔  
即崑崙也山腹至頂皆雪冬夏不消土人言遼年  
成冰六月見之自八九股水至崑崙行二十六日  
程河行崑崙南半日程既又四五日程至地名潤  
即及潤提二地相屬又三日地名哈刺別里赤兒  
四達之衝也多寇盜有官兵鎮防崑崙迤西人簡  
少多處山南山皆不窮峻水亦散漫獸有犁牛野  
馬狼狽羴羊之類其東山益高地亦漸下岸狹隘  
有狐可一躍而越之處行五六日程有水西南來

名納隣哈刺譯言細黃河也又兩日程水南來名乞兒馬出二水合流入河河北行轉西至崑崙北二日程地水過之北流少東又北流入河半月程至貴德州地名必赤里始有州治官府州隸河州置司吐蕃等處宣慰司所轄又四五日程至磧石州即禹貢磧石云

靈州名賢祠碑記

僉事 張嘉謨 郡人

名賢者古今賢人之有名者也德行功業與夫利澤及人者雖所建不同顧因賢制名則一而已名

靈州誌蹟

卷四

四

亦非要而得之者也蓋實在此而名自若焉大而九寰四海小而一鄉一邑無地無賢而賢之名亦未嘗不流播後世不賢者欲致一人一日之名尚不可得况後世而為之祠乎靈為閩陝襟喉國初以土漢之人襍居之今歷百年餘並見繁庶宏治中都憲曹南王公珣始議奏添靈州及州學拔州之俊秀為生徒草創頃王公適去忌者從中以策己之正德己卯都憲東黃王公時中撫邊之暇慨曰聖朝文教溥海內外無不誕敷而吾夫子之道

不以邊隅而或間州治未暇論是學可已乎乃復  
疏其興廢之由及夷夏之人之願上之皇上詢於  
禮曹卿屬議曰可遂復學焉未幾學師篆相繼至  
公集舊學生復分寧夏餘生徃實之夫子廟及學  
舍悉修整倍昔固無名賢祠州人曰惟地有賢惟  
賢有祠天下之通議也靈雖遐邇或生於其地或  
仕於其方先後未嘗無賢不祠可乎乃各出羨餘  
市材木煨甄瓦聚土石鳩工役卜大成殿後為祠  
三楹案豆祭貲悉有所取工始於正德庚辰三月

是歲八月事竣靈之守臣吳山趙璧士夫季泰馬  
璘師生龐經元元經及嘉謨咸擬古傅公燮在漢  
嘗仕議郎多直諒不避權貴康公日知在唐為觀  
察使封會稽郡王忠拒叛逆於靈為文行先達可  
祀之擬前王公珣今王公時中於靈為功德及人  
可祀之偶聞於公公不悅曰他所擬者皆宜惟愚  
不可且興廢繼墜政之常耳僉復進曰古者禦大  
災捍大患以勞定國皆祠之公之功非特一學也  
若中路大沙井至萌城每五里築墩表延相望徃

來行旅遂不為黠虜所掩添設中路叅將一統兵馬三千今可以併遏虜寇清屯田之沙壓崩塌使老少殘疾之人得輕賦稅今得蘇息者不可勝數濬河渠而水利周修險隘而邊塞鞏潔無一芥之沔勞無一日之停其功德及靈茲又大矣若為元祀尚宜曷不可乎公再力辭曰禮樂必俟君子愚智賢不肖必百年而後定其勿強焉復邈復答如初嗚呼若公者可謂不伐善不施勞而始終不變其執者靈之後人不能無賢且名者他日祀是祠為記

鉄柱泉記

管 律

去花馬池之西南興武營之東南小塩池之東北均九十里交會之處水湧甘冽是為鉄柱泉日飲數萬騎弗之涸幅幘數百里又皆沃壤可耕之地北虜入寇往返必飲於茲是故散掠靈夏長驅平鞏實藉之以其嬰是患也並沃壤視為葉土百七十年矣嘉靖十五年丙申都察院左都御史兼兵

都左侍郎松石劉公奉聖天子命制三邊軍務乃躬涉諸邊意在悉閔隘之夷險城寨之虛實兵馬之強弱道路之緩急而後畫禦戎之策以授諸將是故霜行藿食弗避厥勞至鉄柱泉駐瞻移時喟然諭諸將曰禦戎上策其在茲矣可城之使寇絕飲固不戰自憊何前哲弗於是是圖哉維時巡撫寧夏右副都御史字川張公謀與公協乃力襄之即年秋七月丙申案察僉事譚大夫閻度垣墉量高厚計丈尺鎮守總兵官都督効帥師徒具楨幹從畚鍤人樂趨事競効乃力越八月丁酉城成環四里許高四尋有竒而厚如之城以衛泉隍以衛城工圖永堅百七十年要害必爭之地一旦成巨防矣置兵千五兼募土人守之設官操馭皆檢其才且能者慮風雨不蔽之患則給屋以居之因地之利而利則給田以耕之草萊闢禾黍苗又可以作牧而庶孳畜棄於百七十年者一旦大有資矣其廩宇倉場匪一不脩宏綱細節匪一不舉炫觀奪目疑非草創之者先時虜常內覬河東諸堡為



脩甚勤而必先之以食雖翔價博易猶虞弗濟泉  
既城虜憚南牧則戍減費省糴之價自不能騰實  
又肇來者無窮之益是皆出於公之卓識特見而  
能乎人所未能今年丁酉去茲泉南又百里許亘  
東西為牆塹於所謂梁家泉者亦城之重閔疊險  
禦慕之計益密矣借虜騁驕忘忌入之騎不得飲  
進則為新邊所扼退則為大邊所邀天受之矣用  
是以息中原之擾以休番戍之兵以寬饋餉之後  
豈第徵公出將入相之才之德而已功在社稷與  
靈州誌蹟

卷四

八

黃河賀蘭實相悠久謂有紀極哉是故不可以不  
記也松石名天和湖南麻城人字川名文魁中州  
蘭陽人俱正德戊辰進士譚閬西蜀蓬溪人正德  
辛未進士王効陝西榆林人正德丁丑武舉法得  
脩書

重修邊牆記

巡撫 趙時春

國家威制四夷嚴岨封守而陝西屯四鎮強兵以  
控遏北虜花馬池尤為襟喉減其北而益之墉樓  
櫓臺燎鋪墩守哨之具星列棊布式罔不脩成化

以來其制漸淪黠酋乘利稍益破壞以便侵盜而大將率綺紈纓弁子莫或者禦朝議益少之始務遴臬將以功首級差相統制而巡撫都御史居中畫其計督監司主饋餉更請置總制陝西三邊軍務以上卿居之士衆知爵賞可力致則颺起而諸將奏功相繼虜頗懼伏北引矣嘉靖十年總制兵部尚書兼右都御史王公瓊始興復之虜倘屯結恫喝未克即叙時用唐公龍來代博采郡猷惟良是是凡厥邊保悉恢故制寧夏夾河西邈亘數百

里頽垣墊洳於崇於濬嘉靖十四年秋工乃告竣請給官費僅二萬兩役不踰數千人無敢勞怨行者如居掠斂用息是役也相其謀者則巡撫寧夏都御史楊公志學張公文魁繩其任者則巡按御史毛君鳳韶周君鈇督其事者則按察司僉事劉君思譚君閏至於擁衛士衆遏絕軼哭則總兵官都督王効咸協共王役贊襄洪猷是用勒銘以永後範銘曰曼高墉兮繚坤維踞蓐收兮環虬螭鎮貊貉弓伏猳獠揚威稜兮世永熙

東長城閔記畧

副使 齊之鸞

河東弁不毛千里皆古朔方地成化間即共處築長城三百餘里顧虜日抄掠而咸復差薄安足為障平嘉靖乙丑虜入寇總制王公瓊破走之乃憑城極目套壤嘆曰城去營遠賊至不即知夷城入信轡飛掣設險守國重門禦暴不如是也吾欲沿營畫塹聯外內輔車犄角之勢乃疏論之以之鸞與僉事張大用領其事庚寅秋就緒及冬虜入果不能越因復疏請自紅山堡之黑水溝至定邊之

南山口皆大為深溝高壘峻華夷出入之防塹深廣皆二丈堤壘高一丈廣二丈沙土易圯處則為牆高者長二丈餘有差而塹制視以深淺焉閔南四清水興武安邊以營堡名在花馬池營東者為總要則題曰長城閔高臺層樓雕草虎視凭欄遠眺朔方形勢畢呈於下毛卜喇堡設闔門一又視夷險三五里置周廬敵臺若於所皆設戍二十人乘城擊刺射蔽之噐咸具

楊王二公祠記

巡撫 霍 冀

靈州一路乃寧鎮樞會之區北望不百里遠即為  
巢虜其地澶漫夷衍虜悍騎迅長驅莫之能制毒  
痛蔓延秦雍四民之苦於侵暴者久矣國朝成化  
間始自州北築長城三百餘里為扼險守固之計  
顧歲久圯剥虜易窺軼正德丁卯大學士少傅總  
制三邊遼庵楊公一清建議請發內帑脩復舊邊  
上報可發銀若干萬兩公畫地經費自橫城興工  
僅築四十餘里尋為逆瑾矯詔中止時虜患無寧  
歲也嘉靖己丑太子太保兵部尚書總制三邊晉

溪王公瓊復疏於朝請終其緒公得報身提重師  
經畧塞上工自紅山堡起至定邊止延袤四百餘  
里恢拓遺功克底成績而綜理贊翊之者則前為  
憲僉李君端澄後為齊君之鸞焉迄今數十餘年  
方內耕者牧者行旅者戍守者咸有恃而無恐非  
諸公大造之功德耶嘉靖丁巳靈州鄉官王堂周  
鏞庠生呂清張俊劉應璧許宗魯等感今追昔爰  
謀立祠中路叅將徐仁和迺後先相繼脩需鳩工  
委指揮雍時等於城北構堂五楹翼以兩序重門

周垣罔不修飭祀楊王二公於其中而以二憲僉附享焉王堂等偕教官趙應奎屬余為序余惟先王之制有功德於人者則祀之聞茲長城之築楊王二公力任其事群議不撓而憲僉李君端澄齊君之鸞相繼督工險艱不避卒使崇墉岳立大患捍除即古之城朔方築降城者未之過也是皆功德顯著之甚大者合而祀之非禮也與語曰德厚者其感深功大者其思永今楊王諸公沒世垂數十年而士民之感思者無間於遠近今昔忻忻然

建祠舉祀蓋無所為而為之者又豈非天理民彝之不容己者耶噫楊王二公之德及一方功施一時者靈之士民固知之矣至於施之宗社被之天下者亦嘗知之乎楊公為相前後幾十年王公為尚書歷吏戶兵三部皆當正德之末嘉靖之初時值多故二公立朝議大政決大事苟利國家知無不為險難百折無所疑憚故能光輔盛業宏濟時艱在朝廷則朝廷重在邊鄙則邊鄙重蔚然為當代名臣余每思見其人敬奉奔走而不可得也近

以承乏出撫夏州二年來亦得竊藉靈寵幸無他  
虞則所以崇報之者豈獨士民宜爾耶余既議行  
祀事復為之記俾刻石祠下以永邊人之思且使  
後來者有所感而興焉

平虜大捷記

狀元翰林  
康海

嘉靖十三年甲子虜酋吉囊盤據河套數年秣馬  
勵兵將圖大舉入寇兵部尚書兼都察院右都御  
史唐公龍與總兵官都督同知劉文講畫戰守之  
法緩急遠近部署咸定七月初寧夏報吉囊結營

於花馬池唐公遂下令曰賊寇延綏鎮西將軍張  
鳳主之寇寧夏征西將軍王效主之寇固原都督  
劉文主之其當衝截突副總兵都督僉事梁震主  
之十四日己卯虜由定邊乾溝剷崖入鐵柱泉劉  
文堵截不得犯固原二十三日戊子乃從青沙峴  
入寇安會金三縣文率所部叅將霍璽崔高彭濬  
守備吳英崔天爵馳兵往赴明日己丑戰於會寧  
柳家岔及葛家山斬其桀者數十人虜懼思遁文  
曰賊歸必自青沙峴遊擊將軍李勲守脩陶希臯

可趨青沙峴伏道以侯紅古城半箇城零賊之所  
必犯指揮王縉可按兵截殺二城無事海刺都乾  
塩池鳴沙州石溝可安堵矣八月四日戊戌虜果  
合衆出青沙峴文督戰當衝伏兵盡起復大敗虜  
衆而王縉於半箇城與指揮田國亦破零賊前後  
斬首一百二十又七所獲達馬一百三十又二甲  
胄器械衣物一千九百三十又七梁震與叅將吳  
吉遊擊徐淮守脩戴經遇虜於乾溝大戰破之斬  
首一百八十又無所獲達馬二百又四器物四千

七百四十又七王效與副總兵苗鸞遊擊鄭時蔣  
存禮又遇虜於興武營大戰破之叅將史經劉朝  
分布韋州張年又從苗鸞擺邊遇劉文驅虜結營  
北奔各哨奮勇而前後斬首一百三十所獲達馬  
二百又二器物二千一百六十又六虜幸得及老  
營晝夜亟遁故海刺都乾塩池鳴沙石溝號牛羊  
富有之地雖緩行不敢正目視昔駐掠豳隴而諸  
將閉門顛天不能得一遺鏃何如哉十萬之虜經  
年在套秣馬勵兵欲圖大舉二旬之內連復三捷

盖惟皇上神武聖文知人善任故唐公得以悉心  
壯猷諸將得以攄忠自奮爾語言上下相湏千古  
為難豈不信哉唐公受命以來寒暑僅四閱也斬  
獲虜首殆及千餘威寧細溝之功北征已後謂為  
再見今日之捷視威寧細溝不知相去幾許廟堂  
與卒兵大臣必有以休休之心翊贊皇度矣方諸  
簡冊周宣漢武不足言也邊方父老以予撰碑叙  
述其事周告將來辭曰惟明九業篤生聖皇允丈  
允武帝德用昌因心宏化寵綏萬邦內治既洽思

被邊疆惠德有資拂義必匡元臣若德迪惠厥常  
蠢茲酋虜潛蠕幽荒教既未逮螫亦屡倡盤據河  
套未遂驅攘屡犯屢挫曾不戒戍公壯其猷九伐  
斯張青沙之役易若驅羊興武既馘乾溝亦襄大  
舉及蚰鼠竄惟囊恭惟神武所嚮必戢况此元老  
維德之行弗崇虛譽克屏譎狂稽勲者勩而無否  
臧元戎丕奮叅佐孔良節制四載其武湯湯皇心  
勿二公德愈光甲午之捷萬古所望後賢秉鉞尚  
慎勿忘



靈州河堤記

巡撫 張九德

靈州阻河而城其西南當河流之衝復趨而北可  
十里每夏秋湍激受害不啻剥膚雖秦漢二渠溉  
田至數千頃而利與害錯其侵城實甚粵稽洪武  
甲子迄今城凡三徙皆以河故而河亦益徙而東  
自不佞來受事不一載去城僅數十武矣先是禦  
河歲役夫三千束薪十萬罔慮數百千金率委諸  
壑人情洶洶議徙民徙城以為長策不佞則謂禦  
河猶禦虜也虜闖入不偪之去猶延之入乎且勢

若建瓴而僅僅積薪委土與陽侯爭此助之決耳  
計非巨石砥柱之不可獨慮費且不貲計無出不  
佞即捐月俸二百金為役者先而謀之薦紳邑令  
戴君任及諸生輩議堤以石無所事薪改徵河西  
年例柴價五百金軍民願輸地基銀八十兩暨諸  
捐助驗庫藏之羨合之得千四百有奇費用集矣  
則議民間量地畝出夫量田里出車調兩河營卒  
更番受役工力備矣乃造船百艘運峽口石往來  
不絕材具庀矣遂請於先撫寧夏今制臺少司馬

介石李公前制墓今大司徒瞻予李公俱報可則以守備張大綬董隄務指揮孟養浩司出納經歷李盛春程工作大興石隄之役而議者紛若謂濱河皆流沙不受任石恐卒無成功適旋築旋潰衆口愈囂予堅持之曰此根虛易傾耳水豈能負石而趨耶益令聚石投之一日盡八百艘三日基始定於是從南隅實地始累石為隄首四十餘丈用遏水衝繼以次迤西而北其累石亦如之計堤長六千餘丈功甫成而河西徙復由故道視先所受

嚙地淤為灘可耕可藝去城已十數里矣是役也經始於天啟癸亥之正月告成於天啟乙丑之四月凡費時二年有半費金九百一十有奇費米麥六十石而貯尚有餘羨念往歲議隄請帑金萬二千業奉旨下部覆不果今議約三千金猶慮不足至厘少司馬公損俸金百兩而同守盧君自立叅戎高君師孟等亦釀助有差然卒以有餘羨故藺還是皆百執事殫心經畫靡有虛糜之成效也憶不佞初抵靈行河籌之再三始而秦渠堤隕水暴洩又

能灌溉為築長堤瀦之歲比稔而漢伯渠又苦無尾閭腴田皆成巨浸因以治隄之餘為開蘆洞長十三丈五尺高廣各三丈五尺自秦渠北岸抵窪橋疎渠道三十里瀉水入河復故田數百頃增稅額數千石凡費金五十六兩有奇而椿鍊諸費不與焉古有言河者天下之大利大害也故周禮慎水政以防止水以瀦蓄水以溝蕩水其法甚備自隄石而城無受嚙庶幾於河之害遠矣而二渠之役亦借以收其利不佞三年於此未事則憂物力

方事則憂成勞已事則憂久遠今幸三憂且釋得藉手告終事矣抑天下事惟賢者能慮始其次莫若因是三役者因法於古因石於山因力於民因能於衆因主裁於上獲追喜事之辜是皆今日所以成功之本也例不可以無記遂次其終始以係之銘銘曰渾渾經瀆亘以金隄順流而西潛於靈府禔福下土聿鞏靈武爰固我圍用昌我稷黍匪處白璧而崇紺益是維川后之仁俾無逢其菑害亦越千禩曰寧以泰

靈州張公堤記

太僕少卿崔爾進

靈在寧夏鎮河以東劉綜所謂西陲巨屏居人三時農作寄命於河有渠曰漢延曰唐來俱西為鎮城所有其在東者秦家一渠古稱光祿等三渠百家等八渠今湮沒意當時兼東西渠名之或曰即秦家支渠皆不可考渠故有堤土薪間築旋築旋圯久之益廢不復治歲屢不登觀察張公既下車亮采惠疇大猷允迪數問民所恫苦得此毅然謂非石礪無以集事于是相度鳩工躬為激督綜覈

不半載告竣延袤四百餘丈高厚堅緻亘如長虹水無壅滯泛濫頓成有年畚鍤之費出公捐俸及搜括贖鍰不以勞民民大悅營叅戎馬君載道併鄉紳縣尹戴君任等即以張公名堤如姑蘓之白公堤武林之蘓公堤而介郡二守沈君道隆求余為記余按河出崑崙墟歷蒲昌出積石入燉煌諸境以至朔方此即其地也河從高趨下最善潰至是為青銅峽約束漸就平衍稍瀦瀉以資稼穡世謂天下多苦河害惟朔方收河之利良然而關西

諸鎮九原張掖左右遏虜此居其中形雖鼎峙實  
衿喉焉自昔置材官輓飛數萬甲仗糗芻之需仰  
給帑金不及四萬緡其餘民運而外一切取足屯  
田又何約也持笏而畫者母亦曰濱河為利徼靈  
於天實甚奢俾半食其力以舒縣官急而天何可  
常則亦利不利之灼然者矣公清修介節偉畧直  
心盤錯所至剖決若神日加意元元綢繆其制作  
永逸規模成以顧顧滕位相接可導可鄣無盪無  
涸無淤天若不自以旱乾水溢為政而獲畚惟斥

鹵之場芄芃桑麻無論家給人足陳因我庾而市  
價不驟騰湧荷戈輩宿飽以養直前之氣縱天驕  
百萬莫敢南向發一矢即不然狡馬以逞阡陌蜿  
蜒險阻繡錯我以投石拔距之餘遏颺風驟雨之  
衆扼吭踦角制彼死命礪蕭斧伐朝菌耳然則是  
役也自金積而南周索自我入保出遮虜絕甌脫  
之跡盡神臯奧區之域惟公之所保厘而又安之  
而余竊謂此井畫之遺也趙營平行之金城而效  
矣今大司徒所仰屋而嘆必曰遼餉加派南畝三

倍原額監司二千石而下且以此定殿最新餉日  
急舊餉日逋急者終付尾閭逋者致各塞有庚癸  
之呼何如推公此法於薊門通津間芟夷藁無巖  
葺其圯堦埠坊且耕且戰不愈於水陸飛輓數千  
鍾致一鍾乎公堤築既成則有見於河漸內徒懷  
襄之勢且及城隍復切猶溺之視條畫石礮便宜  
上之臺使者興作伊始民之室宇靡所不奠居以  
無至昏墊徼塞始有金湯至夫肅憲章貞百度嚴  
刁斗明烽燧飭將吏課博士弟子董正塩法讐服

援兵傍施潤澤奕世利賴則境以內籍籍有口碑  
在道也虜公既奏禮命有加行且授以大中丞節  
若圻父專九法籌餉命旅余與靈人又拭目廊清  
浹膚藏髓不區區北地闡熙間矣公諱九德號曙  
海浙江慈谿人萬歷辛丑進士

鍾靈書院碑記

知州 周人傑

靈武自唐漢以來人材絕盛著於舊史者代不乏  
也癸巳夏六月余奉檄攝州事既釋奠於

廟進其學之諸文士問以近今數十年來忠臣孝子

義烈獨行之士可舉為風化式者茫無以對重加廉訪僅得節婦五人即為申請

旌表又問其州之志無有也附於朔方郡者亦繼自前明嘉靖間嗚呼文獻之廢墜如此哉是亦守土者之責也當斯之時欲於承乏數月間續二百餘年之缺文勒為一書考稽既難時復不給誠有志未逮矣夫徵文必先徵獻十室之邑有忠信百工居肆事乃成然則欲為斯土興人材嗣休烈書院之設誠不可已而又苦其先無尺地畝宮可藉手者

余於是愈為州人士憾焉秋七月偶出城西門見其野有屋數楹短垣缺齧聞其無人問之則前知州事江君名鯤者所建公廨也計其地可十畝許相其陰陽渠流來自巽西流繞出於屋後地理家常以是為文明之象余得之不勝喜曰靈武人文之盛意在斯乎爰捐俸鳩工刻期剏建董其役者寧夏廩生劉三戒州貢生萬植廩生祁絢張鉅劉興海等恪勤乃事工繕而費不靡門堂之制為屋四重左右學舍共成九院屋必南向冬溫夏涼以

適講誦凡兩越月工遂竣顏其門曰鍾靈書院其  
軒曰環碧其後齋曰遜敏又其後曰活水天來一  
椽之布一瓦之植悉歸於官不以累民自余代庖  
凡五月每有爭官荒地結訟不休者大半斷歸書  
院募民佃焉而收其租入計有一千餘畝時有貢  
生賀景泰捐修南閔亦樂以餘貲相助可見紳士  
聞風好義將來定不乏人余又捐來百石以供來  
歲膏火嗚呼最哉諸生代遭

聖明緬懷前哲得是地而砥礪琢磨其中日有就月有  
靈州誌蹟卷四 二十三  
將母怠爾業母歧爾志繼自今人材蔚興豈徒擢  
高第登顯任為閭里光且必有忠孝義烈文學德  
行名當世者則志乘之作又未必不於是乎權輿  
也因刻石而記之並有望於後之蒞茲土者成余  
未逮焉

奎文書院碑記

知州 廣 玉

作事者必謀其始謀斯臧臧斯久久斯不變所謂  
有治人無治法殆此意也丁未仲夏有請於余者  
曰靈邑西郭門外舊有書院未數年而圯敗瓦頽



垣一無存者鄉士民不欲書院之荒落榛蕪也輸  
貲積千餘兩欲重建之願明公遂其事余以為事  
當慎始書院曩瀕水浸滯潰溢卒致湮沒若再舉  
而再廢之徒糜財曷益遂不果九月之望因讀法  
詣學署司鐸 楊公延余坐書室中清幽敞適遠  
絕塵囂遂偕 楊公四圍周視東有園鬱然深秀  
前後皆隙地乃謂 楊公曰向者諸生書院之請  
君固知之矣得斯地以襄斯舉何善如之然此地  
君客座也胡可廢 楊公欣然曰凡事有輕重有

大小宏獎人倫正俗維風之本此公之責亦余之  
志也藐茲小構其何所靳焉余聞之喜進紳士語  
以故擇其賢能者五六人集料鳩工其規度中設  
講堂復建山長書房東西環精舍明窓淨几為讀  
書所門南向顏其額曰奎文書院其他門房以居  
僕役厨舍以供炊爨次第位置各審其宜以視西  
郭門外之舊制尤加廓矣且夫人之好善誰不如  
我此舉從諸紳士請黽勉經始竊慮修脯膏火之  
費無所出詎意人情尚義工甫作而挾貲飲助者

絡繹不絕非所謂衆弊易舉者與盖天下事有急圖其成而弗克成者亦有難於圖成而卒有成者傳曰專欲難成率作興事屢省乃成無他公與私之間耳公則人心響應若協夫衆欲之同然不疾而速不介而孚所從來矣曷敢貪士民力為己功然吾聞君子成人之美不没人之善靈邑素尚豪華無儂薄之習則斯舉也謀臧則從罔有異議此風俗之醇而亦官斯土者之所樂聞也故為之記

奎文書院碑記

知州 楊芳燦

靈州誌蹟

卷四

二十五

乾隆丁未仲冬余膺

簡命來牧斯邑前攝州事者為長白桂亭廣君謂余曰州之西郭舊有鍾靈書院頽廢久矣邑之士民咸請重建於學署東偏得隙地數畝端景相勢凝工度木三月於茲經營未半君其觀厥成焉余曰君誠能以經術潤吏事者是美政也余敢不踵成之時方寒沍因止工作戊申之春余復鳩工刻期蕝事董斯役者州貢生劉興海生員顏俸趙廷楷廩生胡霖湯銘盤等始終無懈又兩閱月而始落成

得門堂四重前後左右列屋三十餘間其門額廣君舊題曰奎文書院講堂余顏之曰麗澤諸生學舍東顏曰離經西曰辨志傍有餘地雜蒔栗棗菘菹之屬因顏曰東園墻籓庖湑列置備具可以度圖吏可以設琴樽堂宇雖不甚崇深亦差免於湫隘矣仲夏余即延師主講進生童而試之拔其雋異得在書院肄業者三十人其屆期而來校藝者百有餘人徂帶青矜橫經問字一邑之秀萃於此焉余嘗謂古來碩儒談道必在名山如楊子雲之

元亭馬季長之石室雷次宗之廬山王仲淹之龍門書院之設所由昉也至鹿洞鵞湖規模大備類皆踞名勝遠城市今則書院設之於官如欲擇崇峻壑之地勢必不能每見緊望之邑其書院之近孔道者輒假為傳舍迎候輿衛不數年而生徒散矣堂廡圯矣若是者比比焉茲幸書院之建左依宮墻右隣學署既不僂為供張之所而遠離闐闐其地清穆而敞閒諸生遭遇

隆平沐浴膏澤復得此地以藏修游息其勤勉當何如

也余又稽鍾靈書院舊稽稱歸入書院者有官荒地千餘畝今並無一二存者遍搜舊牘悉已散失並見經守之難也茲官師之修脯生童之膏火僅得廣君所捐一千緡余蒞任後又捐二百緡擇商民之老成者歲權其息大倉之旁舊有市舖七十餘間俾墾鬻茲土者歲納其租計一歲所入無多余深懼其不給既捐俸百金以為之倡更望邑之賢士大夫共贊其成以期久遠不廢庶無負廣君朊始之心也夫是為之記

靈州誌蹟

卷四

二十七

峽口禹廟碑

原夫統系承於五帝敷土之烈獨隆隨刊徧于九州鬢河之功最大盖溯陽紆之巨派探板桐之遙源枝流之并千渠懸水之高萬仞噓吸則轉旋星宿蓄洩則鼓蕩風雷而龍門未開呂梁尚阻元氣滯濯百脈沸騰異聚灰之可堙豈捧土之能塞使非神奇特起聖睿挺生何以奠坼疆之黃輿拯沈菑之赤子乎溯白石紐降精玉斗表貺幹父之蠱分帝之憂靈龜呈括象之圖神龍獻導川之畫丈

人之稱九潦將軍之號百蟲五伯宣力八神受命  
咸稟指麾而助順並宣勞勩以奏功遂使藿蒲之  
地悉返耕桑巢窟之氓盡登衽席非天下之至神  
其孰能與于此峽口者黃流之險阨紫塞之巨防  
也舊稱銅口亦曰青山岩巖對峙似重樓之百常  
突兀相望伴圓闕之雙起奔湍為之縛束碕石為  
之整落下通伊闕旁帶流沙窅崖闕鳥獸之門駭  
水集蛟鼉之窟上有禹廟由来已久飛欄虛構浮  
柱相承像設崇嚴儀衛森列所以資呵護妥神靈

疑哉惟是丹青歲久霜露年侵棟幹庸庖宋廡侈  
剝徒襲卑宮之舊未抒崇德之忱制府福嘉勇公  
因巡閱之餘行朝謁之禮憫摧殘之落構察隱嶙  
之餘基鳩工庀材凝土度木測景經始尅日葺功  
金爵承雲璇題納月千尋桂柱峙鰲背以巍峩百  
尺梅梁化龍鱗而飛動冕旒肅穆寶光騰宛委之  
珪椒苴氤氳香氣覆昆吾之鼎將鐫樂石遠命鯁  
生知聖德之莫名如天容之難繪探秘文于岳瀆  
敢摹岫嶽之碑囿淺見于方隅僅紀崑崙之派云

爾

靈州移建太平寺碑

原夫禮燈王於石室湏陟名山謁梵帝於香城先  
尋福地丹崖翠嶺識檀特之高峯碧嶂巖從仰耆  
闍之峻嶽千栞跨險百拱憑虛發雲構於自然極  
神功之不測是以簡栖頭陀之頌蘭成麥積之銘  
佐公天光之碑子昇寒陵之石莫不寫林霞之奇  
秀狀岩壑之幽深遂使鵝殿增輝龍宮長價勒翠  
珉而不敝標白氎以長新若乃寶地迫於囂塵靈

境局於平壤築昆侖之土不過三成開般若之堂  
無逾十笏縱為極筆徒事華辭何足以照燭人天  
發揮龍象然而法惟平等寧陋夫偏隅教推廣大  
不遺於荒徼憑五乘以導述途宏六度而濟塵劫  
在有心者能無述焉惟靈武之故城即河奇之舊  
苑沙瀾匝地東接楊榆之關河流帶犬西連雞鹿  
之塞爰有梵刹近峙亭皋雖岡巒乏隱嶙之奇而  
川原有奧衍之勢徒觀其靈宮四柱祇樹雙林星  
毫月面供寶相之莊嚴珠網銀繩護蓮臺之香妙

百枝鐙影光搖怯夜之旛九乳鐘音響荅占風之  
鐸崇軒間出層栴相承已足狀紫塞之觀瞻作青  
郊之屏障矣矧夫闡微妙之法藏具調御之神通  
流傳沙界諷光音之經震動風輪建塗毒之鼓雪  
山吹藥慧伏衆魔苦海浮航慈濟羣品俾螯慄之  
土俗共結勝因率剽悍之人風爭趨善果詎非象  
教之宏誘法王之神化歟方今遐邇乂安中外禔  
福種人內嚮裔士永寧七政均明躋蒼生於曼壽  
三階齊色慶豐年之樂康見瑞星雲降甘露雨此

太平寺之所由名也是則嘉禾合穎詎讓苾芻之  
芬密樹垂陰即是菩提之彩元韶黃髮俱遊釋梵  
天宮野菽溪毛如饜祇洹法供又何必訪載民之  
國登化人之臺求鷲窟之淨居企鹿野之華苑也  
哉惟是舊基卑濕流潦浸淫高欄岌以將傾繚垣  
犍而不直苔侵玉座雨壞寶衣奔流深黑非閔劫  
燒之餘驚沙坐飛似集微塵之衆余職司守土慙  
然於心爰出俸金以倡善信更命僧心福摹之四  
境以廣檀施鳩工庀材凝土度木去故址三百餘

步築平臺二十餘丈雕甍映日鵬翼將騫翠瓦排  
雲魚鱗欲動寶龕忽徒疑怵利之飛來紺宇潛移  
肖化城之涌出是役也檀行鳧趨役徒麤至闢三  
空之勝境啟七華之妙覺分菴羅之淨土樹堅固  
之貞林諸天則籍以閑安法呂亦此焉遊集某未  
通釋典摛寫葉之元詞夙慕禪宗喻貫華之微旨  
非云宣揚正覺於以歌詠太平迺為頌曰  
靈郊淨域朔塞香林松關左闢茵閣斜臨近帶華  
薄旁連碧□圓鏡四照洪鐘一音持戒定慧越去



來今丹青歲古霜露年深隄衝蟻穴潦集牛涔銀  
楹侈剝珠字銷沉金容雨立瑞象塵侵萬善咸起  
衆力克任康時胥樂至教同欽手雨七寶掌出雙  
層臺駮駮麗塏寄峯影藏怖鴿樂應靈禽花雨灑  
落松風嘯吟慧日夜朗慈雲晝陰定香浥浥靜梵  
愔愔早耽白業敢悶清襟憑廣長舌寫妙明心眞  
如不住了義難尋

鹽州過飲馬泉

李益

綠楊著水草如烟舊是鹽州飲馬泉幾處吹笳明

靈州誌蹟

卷四

三十二

月夜何人倚劍白雲天從來凍合關山路今日分  
流漢使前莫遣行人照容鬢恐驚憔悴入新年

夜上受降城聞笛

回樂峯前沙似雪受降城外月如霜不知何處吹  
蘆管一夜征人盡望鄉

城鹽州

白居易

城鹽州城鹽州城在五原原上頭蕃東節度鉢闡  
布忽見新城當要路金烏飛傳贊普聞建牙傳箭  
集羣臣君臣赭面有憂色皆言勿謂唐無人自築

塩州十餘載至今疆求不犯塞晝牧牛羊夜捉生  
長去新城百里外諸邊急警勞成人惟此一道無  
烟塵靈夏潛安誰復辯秦原暗通何處見鄜州駟  
路好馬來長安藥肆黃芪賤城塩州塩州未城天  
子憂德宗按圖自定計非閔將畧與廟謀吾聞高  
宗中宗世北虜猖獗最難制韓公創築受降城三  
城昇峙屯漢兵東西亘絕數千里耳冷不聞胡馬  
聲如今邊將非無策心笑韓公築城壁相看養寇  
為身謀各握強兵固恩澤願分今日邊將恩褒贈韓

公封子孫誰能將此塩州曲翻作歌詞聞至尊

送李騎曹之靈武

郎士元

一歲一歸寧涼天數騎行河來當塞曲山遠與沙  
平縱獵旗風捲聽笳帳月生新鴻引塞色回日滿  
京城

送鄒明府遊靈武

賈島

曾宰西幾縣三年馬不肥債多憑劍與官滿載書  
歸邊雪藏行徑林風透卧衣靈州聽曉□□□未  
開扉

送李騎曹靈州歸覲

張籍

翩翩出上京幾日到邊城  
漸覺風沙處還將弓箭  
行席箕侵路暗野馬見人驚  
軍府知歸慶應教數  
騎迎

送靈州田尚書

薛逢

陰風獵獵滿旗竿白草颼颼劍戟攢  
九姓羌渾隨漢節六州蕃落縱戎鞍  
霜中入塞瑠弓硬月下翻營玉帳寒  
今日路傍誰不指穰苴門戶慣登壇

峽口山

靈州誌蹟

卷四

三十四

青銅峽裏韋州路千去從軍九不回  
白骨似沙沙似雪憑君莫上望鄉臺

漢渠春漲

神河浩浩來天際別絡分流號漢渠  
萬頃腴田憑灌溉千家禾黍足耕鋤  
三春雪水桃花泛二月和風柳眼舒  
追憶前人疏鑿後于今利澤福吾居

月湖夕照

萬頃清波映夕陽晚風時驟漾晴光  
暝煙低接漁村近遠水高連碧漢  
長兩兩忌機鷗戲浴雙雙照

水鷺遊翔北來南客添鄉思彷彿江南水國鄉

靈武秋風

翠輦曾經此地過時移世變奈愁何秋風古道聞  
笳鼓落日荒郊牧馬馳遠近軍屯連戍壘模糊碑  
剌繞煙蘿興亡千古只如此不必登臨感慨多

興武暫憇

簇簇青山隱戍樓暫時登眺使人愁西風畫角孤  
城晚落日晴沙萬里秋甲士解鞍休戰馬農兒持  
券買耕牛翻思未築邊墻日曾得清平似此不

靈州誌蹟

卷四

三十五

峽口吟

僉事  
齊之鸞

生犀飲河欲北渡海月忽來首東顧馮夷舉手揮  
神鞭鐵角半催河上路至今夜行水泣瞽罔象歛  
歔鬼姦露土人作渠灌稻田元靈委順不敢怒

至靈州

復入人煙境村墟鷄犬聞沙黃偏映日樹綠正連  
雲古道流河潤高嵐壓虜氛服箱轅下特東餉馬  
池軍

九日登花馬池城

白池青草古塩州倚嘯高城豁望眸河翔氈廬  
里迥涇源旌節隔年留轅門菊酒生豪興雁塞風  
雲愜壯遊諸將至今多衛霍佇看露布上龍樓

宿小塩池

弭節塩池側秋光淡戍臺雁聲雲外墮夜雨樹間  
來猛士安能得邊愁不可裁長歌聊徙倚或有伏  
車哀

同徐聽菴李環溪遊聞上戲分田塍二韻

為惜膏腴等石田聊因就下引涓涓渠開荒野資

羣力橋鎖奔湍效往賢灌溉終周千頃地氤氳密  
動萬家烟旁流復導闌干外綜錯高低景亦妍  
渠成水到瀉雲塍即看農工處處興喜動兩河觀  
察使事聞分陝大中丞殷勤命作千秋計措置飲  
逢比歲登亭榭橋梁齊就緒湏知終始有師承

青銅禹蹟

銅峽中間兩壁蹲何年禹廟建山根隨刊八載標  
新跡疏鑿千秋有舊痕憑溯源流推遠德採風作  
述識高門黃河永著安瀾頌晉取豐功萬古存

初至奎文書院呈蓉裳刺史兼示諸生二十韻

武威郭楷雪莊

靈武古雄郡控邊啓奧區茲邦合多幸仙吏實分  
符文雅觀新政陽春自舊敷開堂延教授闢館聚  
生徒卜地巒宮近分流泮水俱巍峩瞻廟貌慎重  
樹碑趺禮器儼三古弦歌猶一隅脩鱗潛密藻翾  
鳳待高梧妙簡直才士交推謬腐儒聲名雖竊忝  
學術卒荒蕪未獲吞丹篆空勞繫白駒吟成敢屬  
和酒熟即相呼竒字時堪訪元言許共娛琳函披  
秘藏去聲寶鑑映清臚觀海從今始談天哂昔愚諸  
君方進步此道有亨衢信是朋來遠方知德不孤  
鳴鐘期大印鑄劍仰洪爐休負文翁化寧吹齊國  
竽經明偕計吏黼黻重

天都

初夏放舟青銅峽口因登百塔寺用松陵集中

楞伽精舍倡和韻

金匱楊芳燦蓉裳

靈源出青銅分流潤郊郭疏為龍骨渠萬頃膏腴  
廓夏始衆綠長和氣銷疹瘼雙峰青刺天晝日光

靈州誌蹟

卷四

三十七

澹泊拘怒喧波濤呀開門崖嶠堅逾玉壁城險過  
石匱閣沿隄行水來露冕褰車箔不辭跋履勞暫  
得登臨樂嵐光破空碧霞氣紛華聖俯瞰九曲流  
貫注長不涸却登櫺頭船輕身冒險惡捩柁捷有  
神可喜亦可愕龍門投箭筈瞿塘斷竹筏蛟虬怒  
欲立夔兩紛可摸潭渦翻雪車石稜避霜鏢轉丸  
下峻坂馱馬脫羈絡掠耳震砰訇奪眸眩輝燿亂  
流萬人呼出險千丈落迅若乘飈輪翩如躡雲□  
吏道苦拘檢塵機多礙着偶然得一快似亦天所

醉尋幽入梵宮憑高望六幕嶺岼百浮圖阿誰所  
鐫鑿浮柱倚危岑層構臨巨壑疑是阿育王來此  
翦鼓薄門鼠緣垂藤怖鴿觸懸鐸同遊得辯才談  
空相應諾雄逐野千行已免睡蛇蠱天香聞杳靄  
貝典翫深博徘徊日移晷微吟招隱作靜境足留  
連非祇為禪縛伊余眈白業藜藿甘寂寞試作物  
外觀心口自營度七寶座莊嚴八閔齋儼恪平生  
默自懺豈止一重錯何時遂微尚林泉好棲托行  
隨拾橡□坐對巢松鶴

同作

無錫  
侯士驤  
凌衢

雙峯束洪流屹立儼銅郭長河溢星宿汎濫實曠  
廓大哉神禹力疏鑿祛民瘼一方資灌溉萬類得  
棲泊懸崖扞賊湍犇濤突巉嶠艱疑上瞿塘險踰  
登棧閣首夏事清眺巾車揭疎箔偶于風沙窟快  
覓山水樂日輪沉碎光瀲灩翻赭堊劇愁地肺搖  
恐致天池涸探竒歷幽憂嗜僻窮怪惡躡峻足屢  
躩瞰虚心卒愕乘興招野航放□解輕箬雲嵐生  
倒影黛色紛可摸捩柁箭離弦迴撾鳥脫絡風門

靈州誌蹟

卷四

三十九

沙喧雷水齧石淬鏢入峽天忽低有目頓成矐平  
生負跳盪到此驚膽落踏浪學飛鳧破空下煙屨  
徑渡千仞淵始知身所著竒險雖暫經夙願得交  
酢野迥綠成海林深雲聚幕孤嶂孤寺蹲百塔百  
靈鑿紺殿枕層岡丹甍架危壑人稀市聲遠境靜  
塵慮薄雜花布妙香清籟戛踈鐸得道湏慧業茲  
言心已諾倘墮野狐窟何以祛毒蠱空空談辟支  
瑣瑣務施博直以貪生故妄希釋梵作佞佛竟無  
成終身被禪縛羌余蠟游屐偶來証寂寞霽景愜



遐慕貝典窮隱度選勝造幽微齋心自清恪始悔  
當濃春縮屋真大錯嘯咏得微悟烟霞有深托赤  
壁逐坡仙橫江夢歸鶴

同作

浦江周為漢

嶧東

鞿紕苦風塵岔埽厭城郭夏始溯長河一葉泛寥  
廓窮薄險能輕烟霞癖成瘼中流浪簸掀勢放不  
容泊迎面排亂山吞帆辟雙嶠窈窕隱堂隍艱脆  
峙樓閣倒影疑堆烟捲霧忽開箔浩渺流波平曠  
蕩客心樂盤渦鬱洄漩頽壁襍丹堊槩急堤欲行

靈州誌蹟

卷四

四十

沙露川恐涸峽勢漸逼窄波形陡深惡魚沫腥或  
聞怪氣黑可愕怒發千鈞弩驟斷轆轤索絕岸幸  
許登裂石不敢摸呀豁鏗雲根蘄劣磨蓮鍰羣山  
亂犇突一徑細連絡盪日波有光奪睛目恐矐俯  
白駭雲生捫碧愁天落攀蘿捨疲筇印苔躡棕屨  
路轉境乍開地寂心無着山僧啟禪扃揖客歡酬  
酢登塔禮金仙入龕揭珠幕巖窾神丁開崖厂鬼  
斧鑿向背拱千巒晦明變衆壑蛟囚樹屈盤雷聚  
水噴薄濛濛散空香泠泠聞清鐸嗟余事遠遊山

林負宿諾道緣苦未深俗慮迫相蠹敗車驅簿笨  
褐衣曳寬博自憐世網羈空吟招隱作邂逅愜林  
泉倏忽擺纏縛盪胸吸流影瞠目望大漠長嘯何  
激昂竒句偶裁度暫得任疎頑誰能守恪吁嗟慕  
榮利趨向良乖錯何當謝塵氛幽棲遂遠托駐景  
逐飛仙雲中控孤鶴

受降城

楊芳燦  
蓉裳

萬里榆關道韓公有舊城草埋危堞墮風挾怒沙  
鳴戍士橐弓卧邊氓負耒耕無勞壅門設蕃部久

靈州誌蹟

卷四

四十一

輸誠

前題

郭楷  
雪莊

韓公受降處遺堞至今存獨展臨邊策寧誇列騎  
屯山形猛虎踞地勢鬪龍蹲健筆鑱碑碣千秋說呂  
溫

前題

松江俞訥  
銅夫

故壘餘荒草韓公舊列營秋風吹古道落日照邊  
城百雉寒苔碧重関暮角鳴自誇身手健常傍塞  
垣行

前題

侯士驤

欲訪韓公蹟蒼茫大夏西城分三足峙天入四垂  
低原古棲木黍時清息鼓鼙憑高無限意□古且  
留題

前題

錫山 秦崙源 □臺

突兀三城舊周防萬里遐弓刀嚴列堠旌旆擁平  
沙地險爭魚齒天驕制犬牙只今蕃落靜長策未  
湏誇

前題

靈州誌蹟

卷四

四十二

朔塞巖城古蒼茫認廢垣雄邊手騎靜危堞萬人  
屯已足挽驕虜何勞置壅門拂雲祠畔望蘆管起  
遙原

過僕固懷恩墓

楊芳燦

唐代當中葉漁陽起判藩驍雄出裨將義憤救中  
原酣戰摧強敵孤軍領外援假威添虎翼協力剪  
鯨吞左僕班資貴真王爵秩尊氣驕非易制寵極  
轉成怨反側由羣議寬仁負主恩養癰分節鎮召  
亂誘羌渾自詫功無並寧知禍有源飲章爭告變

謾語尚陳寃，蘓峻懷非望。  
龐萌肆妄言，士擐三載甲。  
宛率六軍屯，涇水全師覆。  
鳴沙數騎奔，餘生逃斧鑕。  
殘骨載輜輶，壞道沉碑失。  
陰厓破冢存，悲風作嗚咽。  
疑是健兒魂。

前題

郭楷

連岡鬱黃雲，四塞慘白日。  
陰風沙石號，短草冷蕭瑟。  
遙遙見孤邱，蓬蒿荒不銍。  
云是懷恩塚，年多阡碣失。  
有唐昔中葉，安史亂侵軼。  
所賴朔方軍，僇力奮羣率。  
如何塚中人，功名乃不卒。  
釁因雲京搆，情

靈州誌蹟

卷四

四十三

緣奉先室四鎮徒，陰謀六罪漫口實。  
焚如良自取，猶幸逋斧鑕。  
封忝異姓王，名污史臣筆。  
阿母揮白刃，逐賊蒙優恤。  
愛女系天潢，遠嫁崇禮秩。  
忠孝爾竟虧，魂魄應慚慄。  
千秋遺壙在，已作狐兔窟。  
月夜牧馬歸，何處鬼雄叱。

前題

侯士驤

軋犖山前走劇賊，千里連營甲光黑。  
兩京已潰哥舒降，健將從戎鐵勒將軍許。  
國初靡他陣前研子，揮霜戈營門角響。  
宵傳兵馬鬣，冰寒曉渡河。河陽

一鼓摧堅壁叱咤英英風萬人敵功成自懼置閑  
散請為降奴建旄節養癰河北從茲始論古純臣  
詎如是縱無讒口伺含沙未必功名竟堪恃六罪  
陳詞隙已成構之况有辛雲京當時悔過入待罪  
主恩猶可全其生計不出此乃再誤養兵召寇當  
遲暮鳴沙歸骨遁天刑強固性成終不悟闔門死  
事四十人不幸馬革留殘身可憐百戰中興將末  
路披猖作判臣我来憑弔徑荒壠陰風匝地寒雲  
重咫尺難尋靈武臺夕陽衰草寒雲重

靈州誌蹟

卷四

四十四

小池塩

楊承憲

飴塩誰種出雲塍回樂池頭用不勝豈藉牢盆人  
代鬻但攜筐筥野堪承沙瀾晝涌明於雪齷氣春  
團淨似冰經宿乍看絲雨散滿川已見玉華凝非  
同安邑因風熟應比昆吾逐月增暖漲土花青結  
繡晴涵水暈白生稜飛霜詎為凌秋勁積素還宜  
待日蒸薄靄漸銷痕皎皎浮漚微浣影層層鑿厓  
應笑勞無益引瀑何湏巧自矜莎磧元精搜窵窳

荒畦銀汞掃重仍

物類相感志塩根一名太陽元精明淨者如汞

堆盤表

潔形堪再入鼎和羹味可憑寧俟沃波朝聚橐不  
勝沸火夜溝燈產連谿收難竭成藉陰陽價豈騰  
千里負餽皆攬載萬夫侵曉共擔登利輕一孔民  
爭藉齏惜窮邊賊有恒果是

盛朝寬大處天威無盡協休徵

魏書元雍奏云  
塩者天威也

### 靈武臺

侯士驤

朔方形勝西陲雄一隅再造誇唐宗至德遺蹤杳  
難問荒臺淪沒生蒿蓬漁陽鼙鼓動羣醜函關失  
險無人守阿瞞夜半出延秋崎嶇蜀棧乘驟走紫

### 靈州誌蹟

#### 卷四

四十五

盖黃旗指劍州馬嵬父老苦遮留至尊已徇權宜  
策殿下湏從恢復謀裴冕堪為北道主迴風捲甲  
趨靈武白衣宰相佐風雲黑稍將軍擁貔虎玉璽  
西來士氣生居然號令衆心傾花門共躍勤王騎  
葉護長驅蕩寇兵軍聲遠震連閔隴令公將將能  
持重戈鋌百道怒鯨奔旋看駭鹿無遺種虎帳龍  
韜據上游竒功指頤兩京收捷書飛達蛾眉嶺仙  
仗重開萼樓掃除氛侵清宮闕表迎避位情非飾  
黃袍手著似嬰兒此日何曾虧子職倉皇行在建

旌旗想見神靈呵護時誰信邊城三尺土當年曾  
築太平基

邊牆

楊芳燦

野日荒荒外邊牆入望遙風高原散馬雲迥塞盤

雕蒸土頽垣在沉沙折戟銷登臨無限感戰壘認

前朝

前題

郭

楷

雪莊

一帶繚垣峙雄邊制四隣黃沙今夜月白骨古時

人飲馬窟猶在鳴刁蹟已陳時清烽戍減耕牧樂

靈州誌蹟

卷四

四十六

斯民

前題

松江俞

訥

斥堠烽烟靜沿壕長綠沙高臺蹲健鶻荒磧卧明

駝地利宜耕牧邊氓息鎧戈驅車徑廢堞懷古漫

悲歌

前題

侯士驤

古堞儼周遭黃雲補斷壕客心沉戍角邊日澹征

袍野潤牛羊小天空鷹隼高康時本無外設險笑

徒勞

前題

秦崙源

野霧冷冥冥斜陽下古亭客愁侵夜拆成大亂秋  
星土銼眠難穩村醪醉易醒他年談舊事曾向塞  
垣徑

前題

楊承憲

縱目長城外黃雲幾萬層霜高秋試馬風勁客呼  
鷹自有四夷守休誇一障乘數聲邊角動平楚暮  
烟凝

靈州古槐

石渠

靈州誌蹟

卷四

四十七

上古有大椿八千歲為春八千歲為秋此說非無  
因靈州衙齋有槐樹輪困離竒饒生趣或云齊景  
公爰槐犯者即刑傷入墓或云甘泉谷移來投閣  
子雲曾作賦或云音聲忽出自都堂或云片片見  
相西天王或云神堯入關先植此紛紛臆說皆愚  
叩叩謂不材之木常能壽綠不知肥紅不瘦且能  
不受令於天飽耐霜雪神逾堅但今無論年與月  
亦無論其全與別卽此清陰蔽我廬生意欣欣超  
清越更兼桑柘榆柳蔭四郊鷹鷂徙兮鸞鳳□□



樹生枝徵嘉政芙蓉綠水聊解嘲

邊城秋易知行

草綠赫連臺遲遲春日暮西風偏早來騷屑撼庭  
樹溶溶月流銀灑灑璣凝露蘭膏炯明霜鴈影□  
前度我欲寄尺書渺渺情難訴寒蛩扶戶吟和盡  
淒涼句

和蓉裳九日橫城登高放歌

吳山絕頂崔嵬遊人九日恣登高廿年行脚未  
曾到夢中夜夜聞江濤醒回詫訝身是客呼厨快

作□重陽餽一餐香飶金釵溜駕言何處堪遊敖

城西仙尉折簡召師弟甥舅相聯鑣琉璃杯深琥

珀紫瑪瑙盤釘紅葡萄一叫帽落杯在手顧覺右

手空無螯有酒不飲君記取非直亡羊而補牢歸

問闐人車停處報君今在長城壕雄邊絕塞佳節

併極目千里紆煩切詰朝相見話未已新詩袖出

輝銀毫星輶轆塵坌集夫君不讓劉郎豪讀罷

還君三嘆息吾儕幸與

昇平遭此地絕古稱險要紛紛割據雄睢尻天順

以後棄河外河冰一夜紛馳驚鐵柱泉邊虎豹窟  
芴苦灘頭豺狼嗥今看西山如駁馬穹廬遠徙弓  
矢橐驛舍星連炊烟接明駝橐橐來西燧文華武  
英峯簇簇會塋何用戈矛操君今攝官已三載政  
成民俗無訛臯銅口河流建瓴注石岡砂磧恣芟  
藪幅員千里隱一國宰割正合操牛刀迎刃而解  
導窾理羨君餘事主風騷登高懷古作林立一見  
咋舌誰喧囂勝地良辰禁不得放歌例合歸吾曹  
風雨重陽句難續寸鐵持向蘭山鏖

督渠工夜宿山村

華原  
梁楚翹

日暮渠工罷孤村獨夜閒風輕聞水浪月朗對柴  
關古寺全依石人家半在山更深眠未穩鄉夢此  
時還

九日重遊東塔寺

勝地經年到清罇九日開河流當檻曲塔影過城  
來露冷黃花瘦風踈碧草摧坐臨無限意目極小  
山隈

古刹堪憑眺携囊上翠微夕陽孤鳥没斷澗白雲

靈州誌蹟

卷四

五十

飛曲徑僧歸晚空壇客過稀徘徊金像下秋色冷  
巖扉

秋登太平寺寺築高臺建成

層臺巍聳傍雲橫殿宇周廻落照清客到烟林開  
曲徑坐來霜葉下高城侵牕午日薰蘭氣入檻秋  
風散聲聲向晚依依未歸去棲鴉啼上一輪明

大成殿旁古松

聖德垂無極凌空見古松青柯經百代素影傲三  
冬常伴笙竽響時親劍珮容近階依鬣屨承溜藉

蒙茸老幹應棲鶴虬枝欲化龍崇高排巨闕茂密  
隱踈鐘自有秋陽暴還因泮水濃後彫誰爾詠千  
載許相逢

靈邑自漢時界匈奴唐初北鄰突厥後又接近吐蕃宋則陷入西夏為戎馬衝踐之地我

國家重熙累洽邊境清寧百餘年來此都人士久不識兵戈為何物矣而試即歷代邊防事蹟取而覆之始歎民之生彼時者孔棘而

卒朝功德之隆遠邁漢唐萬萬者其涵濡為最深也覽斯編者勿徒視為陳迹也可

邊防

漢元封元年上既置張掖燉煌郡自制封禪儀將登

封太山又以古者先振兵釋旅然後封禪詔曰南

粵東甌咸伏其辜西蠻北夷頗未輯睦朕將巡邊

陞躬秉武節親帥師焉乃行自雲陽歷五原出長

城北登单于臺至朔方臨北河勒兵十八萬旌旗

千餘里遣郭□单于曰南越王頭已懸北闕今单

于能戰天子自將待邊不能即南面而臣於漢单

于讐不敢出帝乃還祭黃帝塚而釋兵

魏太平真君五年以刀雍為薄骨律鎮將到任上言

富平西南三十里有艾山南北二十六里東西四十五里鑿以通河似禹舊跡其兩岸作溉田大渠廣十餘步山南引水入渠河水激急沙土漂流今渠高於河水二丈三尺水不得上艾山北河中有洲渚水分為二西河小狹臣求來年正月於分河之下五里平地鑿渠築其兩岸令高一丈北行四十里還入古高渠又北八十里合一百二十里計用四千人四十日功可溉官私田四萬餘頃七年又表曰奉詔高平安定統萬及臣所守四鎮運穀

五十萬斛付沃野鎮以供軍糧臣鎮去沃野八百里道多深沙必致滯陷計車五千乘運十萬斛百餘日乃得一返今求於河水之次造船二百艘一船勝二千斛放舟順流五日而至功輕於車十倍有餘

文帝大統元年遣李虎擊曹泥虎招諭費也頭之衆與之共攻靈州凡四旬曹泥請降虎克靈州二年高歡自將萬騎襲魏夏州不火食四日而至縛稍為梯遂入其城擒刺史斛拔彌俄突因而用

之留張瓊將兵鎮守遷其部落以歸靈州刺史曹泥與婿涼州刺史劉豐復叛降東魏魏人圍之水灌其城不沒者四尺歡發阿至羅騎徑渡靈州遶出魏師之後魏師退歡追泥及豐収其遺戶五千以歸

隋文帝開皇五年令崔仲方發丁男三萬於朔方靈武築長城東至黃河西距綏州南至勃山嶺綿亘七百里

十八年詔蜀王秀出靈州道擊突厥

靈州誌蹟

卷四

五十四

十九年春遣楊素出靈州道擊突厥路逢魚俱羅與語大悅即奏請同行俱羅與數騎奔擊瞋目大呼往返若飛

是年突厥犯塞以段文振為行軍總管拒之遇達頭可汗於沃野擊破之明年率衆出靈州道以備胡無虜而還

煬帝大業九年靈武白瑜婆兵起賊帥白瑜婆劫牧馬連突厥隴右多被其患謂之奴賊

唐貞觀三年回紇與諸部攻薛延陀殘之并有其地

遂南踰賀蘭山境諸河遣使者獻款太宗為幸靈州次涇陽受其功

十年春正月突厥阿史那社爾來降以為左驍衛大將軍處其部落於靈州之北留社爾於京師尚主興屯兵

太宗時以延陀滅欲并契苾等降之復遣江夏王道宗率阿史那社爾等分部窮討帝幸靈州節度諸將於是鉄勒十一部皆歸命天子

十七年薛延陀來納幣詔絕其婚先是薛延陀執

契苾何力上遣使與和親許以公主妻之何力歸是年遣其侄來納幣獻羊馬何力言不可與婚帝曰吾已許之不可失言何力曰勅令夷男來親迎被必不敢來絕之有名上乃詔幸靈州召真珠可汗會禮真珠欲行其臣曰往必不返真珠曰天子聖明遠近皆服今親幸靈州以愛主妻我得見天子死不憾矣薛延陀何患無君又多以牛羊為聘經沙磧死者過半乃責以聘禮不脩絕之

高宗咸亨二年吐谷渾畏吐蕃之偪徙靈州其故



地盡入吐蕃

宏道元年突厥寇蔚州崔智辨敗死或議棄豐州保寧夏唐休璟以為不可上疏曰豐州控河遏寇號為襟帶秦漢以來常郡縣之土田肥美宜耕牧隋季棄之貞觀之末募人實之西北始安今廢之則河濱之地復為賊有寧夏等州人不安業非國家利高宗從其言後授靈州都督乃陳方畧復四鎮

中宗嗣聖十三年默啜寇涼州執都督許欽明其靈州誌蹟

卷四

五十六

後寇靈州以欽明自隨至城下使說守將降明呼曰我乏食求美醬良采及墨意欲城中選良將引精兵夜襲虜營而城中無喻其意者遂被害

十九年突厥寇臨夏遂寇并州遣薛旭張仁愿禦之  
神龍二年十二月突厥默啜寇鳴沙靈武總管沙吒忠義與戰軍敗

代宗廣德二年僕固懷恩反寇太原初回紇辭歸國上詔僕固懷恩護送之至太原節度使辛雲京

疑其反閉門不出雲京與中使駱奉先力言懷思  
有反狀思奏劾辛雲京朝廷和解之於是不入朝  
上書自訟遣其子瑒攻太原為其下焦暉白玉攻  
殺之其都虞侯張維岳殺焦白而竊其功傳首京  
師懷思入白其母母提刀逐之懷思棄其母引兵  
據靈州顏真卿李抱玉皆請用郭子儀鎮朔方上  
從之  
大歷二年九月吐蕃圍靈州冬十月路嗣恭擊却  
之

三年九月吐蕃寇靈州朔方將白元光敗之壬辰  
又敗之於靈武

八年吐蕃寇靈州郭子儀敗之於七級渠

九年城塩州初塩州既陷塞外無復保障吐蕃常  
阻絕靈武侵擾鄜坊詔發兵城塩州又詔涇原山  
南劍南各發兵深入吐蕃以分其勢城之二旬而  
畢命節度使杜彥光戍之由是靈武銀夏河西獲  
安

唐書突厥傳

突厥默啜自立為可汗篡位數年始攻靈州多殺  
略士民武后以薛懷義為朔方道行軍大總管凡  
十八將軍出塞雜華蕃步騎擊之不見虜而還  
契丹李盡忠等反默啜請擊賦自效詔可册拜遷  
善可汗引兵擊契丹會盡忠死襲松漠部落盡得  
李萬榮妻子輜重酋長奔潰武后美其功復詔命  
册拜未及行俄攻靈殺二州縱殺畧為屯將所敗  
默啜負勝輕中國有驕志大抵兵與頡利時畧等  
地縱廣萬里諸蕃聽命歲入邊戍兵不得休乃高

選魏元忠檢校并州長史按屯以待又徙元忠靈  
武道行軍大總管脩虜

長安三年默啜遣使請婚獻馬后渥賜其使中宗  
始即位入攻鳴沙於是靈武軍大總管沙陀忠義  
與戰不勝死者幾萬人帝詔絕昏購斬默啜者王  
以國默啜殺我行人鴻臚卿臧思言詔左屯衛大  
將軍張仁亶為朔方道大總管屯邊明年始築三  
受降城於河外障絕寇路

睿宗時默啜攻九姓戰磧北九姓潰人畜皆死思

結等部來降帝悉官之拜薛納朔方道行軍大總管太僕卿呂延祚靈州刺史備邊默啜有拔野古殘衆所殺傳首京師

永泰大歷間吐蕃再遣使者來聘於是戶部尚書薛景仙往報詔宰相與吐蕃使者盟俄寇靈州掠宜祿郭子儀精甲三萬戍涇陽入屯奉天靈州兵破虜二萬上級五百首

大歷三年虜引衆十萬復攻靈州朔方將白元光再破其衆獲馬羊數千

八年虜六萬騎侵靈州敫民稼進寇涇邠渾瑊與戰不利復整卒夜襲其營涇原馬璘以兵掩之潘原射豹皮將死軍中夜哭虜乃遁去璘收所俘士及男女而還

大歷十三年虜以四萬騎寇靈州塞漢御史尚書三渠以擾屯田為朔方留後常謙光所逐

貞元二年吐蕃請盟言靈塩節度使杜希全外蕃所信請主盟帝使報曰希全守靈州有分地不可以越境以渾瑊為會盟使虜卒敫盟火塩夏二州

廬舍頽郭堞而去希全分兵保之

貞元八年吐蕃寇靈州陷水口塞營田渠發河東振武兵合神策軍擊之虜引還

自虜得塩州塞防無以障遏而靈武單露鄜坊侵迫寇日以驕數入為邊患帝復詔城之使涇原劔南山南深入窮討分其兵母令專向東方詔朔方河中晉絳邠寧兵馬副元帥渾瑊朔方靈塩豐夏綏銀節度都統杜希全及邠寧節度張獻甫等五節度合兵三萬以左右神策將軍胡堅張昌為塩州

行營節度使板築之役者六千人餘皆陳城下九年始裁閱二旬訖功而虜兵不出

貞元十六年靈州破虜於烏蘭橋十七年吐蕃大侵靈州

永貞十二年吐蕃使論矩立藏來朝未出境吐蕃寇宥州與靈州兵戰定遠城虜不勝斬首二千級穆宗即位虜引兵入屯靈州靈州兵擊劫之

長慶元年吐蕃遣使來朝且乞盟詔許之大臣豫盟者悉載名於策方盟時吐蕃以壯騎屯魯州靈

州節度使李進誠與戰大石山破之

大中三年靈武節度使李欽取安樂州詔為威州

五代後梁開平三年岐王李守貞因梁將劉知俊來降

使知俊將兵取梁靈州以處朔方節度韓遜遣使

告急於梁梁主遣康懷貞寇彥卿將兵攻邠寧以

救之克寧衍二州拔慶州南城遊兵及涇州之境

知俊聞之解圍引還梁主急召懷貞等還知俊據

除邀之懷貞大敗僅以身免

後唐明宗天成四年以康福為朔方節度使初福

善胡語明宗退朝多召入訪以時事福以胡語對

安重誨惡之謂之曰汝但妄奏事會當斬若福懼

求外補重誨以福為朔方節度使以靈武邊胡有

兵禍福見唐主泣辭唐主命更他鎮重誨不可不

得已以兵送之福方至渠遇羗兵邀之福擊敗之

至青銅峽又遇野利大蟲二族數千帳又擊破之

遂進至靈州自是朔方始受代

後晉高祖天福四年靈州戍將王彥忠據懷遠城

叛高祖遣供奉官齊延祚往招諭之彥忠降延祚

殺之高祖怒其擅殺除延祚名重杖配流

開運三年靈州党項作亂初馮暉在靈州留拓跋彥超於州下故諸部不敢為寇及將罷鎮而縱之王令溫代鎮不存撫羗胡以中國法繩之羗胡媿怒彥超與石存也廝三族共攻靈州六月晉復以馮暉為朔方節度使將關西兵擊羗胡暉引兵過早海糗糧已盡拓跋彥超衆數萬扼要路據水泉以待之軍中大懼暉以賂求和於彥超彥超許之自旦至日中使者往返數回兵未解藥元福曰虜

知我饑渴陽調和以困我耳若至暮則吾輩成擒矣今虜雖衆精兵不多依西山而陣者是也其餘步卒不足為患請公嚴陣以待我我以精騎犯西山兵小勝則舉黃旗大軍合勢擊之破之必矣乃帥騎先進用短兵力戰彥超小却元福舉黃旗暉引兵赴之彥超大敗明日暉入靈州

宋太祖建隆二年靈武節度使馮繼業獻馬五百橐駝百野馬二乾德二年靈武饑轉涇粟以饗

太宗至道元年以會州觀察使知清遠軍田詔斌

為靈州兵馬都部署二年五月李繼遷寇靈州九月夏州延州行營言破李繼遷於烏白池至道三年以殿前都虞侯王昭速為靈州路都部署二月丙申朔靈州行營破李繼遷

真宗初即位夏人寇靈州合河都部署楊瓊擊走之

咸平四年八月戊申出環慶至靈州地圖險要示宰相議戰守方畧閏十二月壬午靈州言河外砦主李瓊等以城降西夏

咸平五年三月丁酉李繼遷陷靈州知州裴濟死之六年以西涼府六谷首領潘羅支為朔方軍節度靈州西面都巡檢使

哲宗時鍾傳議取靈武環慶亦請出師命折可適將萬騎往即薄靈州川夏人扶老挾幼中夜入州城明日俘獲甚夥而慶兵不至乃引還

元豐四年王師西征命涇原副都總管劉昌祚率蕃漢兵五萬受環慶高遵裕節制昌祚先至靈州幾得城遵裕嫉其功遣使止之不用其計遂以潰



歸

孝宗乾道六年夏主仁孝分國與其相任得敬得敬相夏二十餘年潛懷異志誣宗親大臣仁孝不能制乃分西南路及靈州囉龐嶺地與得敬為國且上表于金為得敬請封金主以問宰相尚書令李石等曰事關本國我何與焉不如許之金主曰有國之君豈肯無故分國與人此必權臣逼奪非夏主本意夏稱藩既久一旦逼于賊臣朕為四海主豈能容此當為誅之乃賜仁孝詔曰先業所傳

亦當固守今茲請命未知措意所在當遣使來詢問得敬始懼仁孝乃謀誅之秋八月任得敬伏誅光宗紹熙五年夏主仁孝卒子純佑立仁孝在位五十五年始建太學於國立小學於禁中親為訓導尊孔子為帝然權臣擅命國勢日衰自此始也寧宗嘉定二年蒙古入靈州夏主安全降夏自是益衰

萬歷十年靈州卒楊文遇馬景亂洪武初畧定陝西殘元部落率衆歸附立靈州守禦千戶所其屬

處於瓦渠四里為民號土達使自耕食簡其壯者  
充營卒文遇景乃土達楊倘兀馬火丹之孫也素  
獷悍萬歷十年叅將許汝繼以勇名擢靈州任甫  
五月濕東部卒御下過嚴小犯者必繩以軍法怨  
讟大生汝繼察知愈恨之不少假衆益怒文遇景  
遂謀為亂黨與嚮應四月八日啓叅將署直入郭  
濟逞凶先之汝繼赤身起迎截濟髮至死髮猶在  
握宅中男婦並見戕無噍類文遇景等開北門出  
迎其黨徐龍掌所千戶蒯訓于戶戴儒遂閉門以

守賊不得入奪馬逸走餘賊奪商民騾馬出南門  
乘隙肆標掠同知呂珩馳使告變巡撫晉應槐兵  
備道劉堯卿檄遊擊唐堯輔攝靈州事令廣武中  
衛守將王保等據邊口把總李鯤楊朝率兵於九  
泉山沙渠諸處追賊獲三十餘人楊文遇馬景等  
並斬於市

怪異之事聖人所不道然自五石六鵠之異書於春秋而後世史家代有五行傳其事雖不經見亦可以識天地之大無所不有矣故余纂斯誌而以祥異終焉

貞觀二十年九月辛亥靈州地震有聲如雷

二十三年四月靈州河清

大中三年十月辛巳上都及靈武鹽夏等州地震壞廬舍壓死數千人

靈州誌蹟

卷四

六十六

七年九月靈州奏黃河清

咸通十四年靈州陰晦

六年秋夏州雲霧晦冥旦及禺中乃解

調露元年鳴鵝羣飛入塞相繼蔽野至二年正月還復北飛至靈夏北悉墮地而死視之皆無首

太平興國三年靈州獻官馬駒足有二距

雍熙二年靈州芝草生知州侯贇刻木為其狀來獻

至道二年十月靈夏等州地震城郭廬舍多壞占

曰兵饑是時西夏寇靈州

成化十年十月丁酉靈州大沙井驛地震有聲如雷自後晝夜累震至十一月甲寅一日十一震城堞房屋多圯

十八年靈州李景芳家白鼠晝遊次年其子中鄉試

皇清康熙九年寧夏河溢淹靈州南關居民

十八年惠安堡生員張辟家豬生八子皆有肉角四目三足五足者旋死

靈州誌蹟

卷四

六十七

三十三年靈州民王邦彥妻一產四男子

四十七年靈州井中見龍

雍正十一年又十月霜花雪縉四十餘日

景泰間有李姓者至古靈州城東北鉄柱泉傍有窟偕一僕藝燈以入行二十步推開一石門有銅鑄釋像傍有二僧屍覆以錦衾其面如生而金貝之類環具左右李恣意取之將出風颯颯燈息門閉鼓鈸齊鳴李恐懼欲死盡棄所取者俄於傍窟匍匐而出明日集衆往掘之堅不能入

朔方志

靈州誌跋

國有史家有乘而邑有志皆所以彙輯憲章維持政教也  
余承乏甘省近十年矣大憲不以余不才每委任邊劇凡  
所歷之處小心祇職罔或自逸而尤以舉墜修廢為己任  
未嘗以事之難為而輒止嘉慶戊午夏余以邊俸報滿自  
新疆見代抵省閱二月復委署寧郡之靈邑蓋靈邑在寧  
屬為河東巨屏實北陲形勝之區也余嘗考歷代故事知  
是邑自漢初建置迨有唐遂成重鎮設大都督府有鷄田  
鹿塞之州廻樂燭龍之境輪廣近千餘里其間如山川扼

靈州誌蹟

跋

一

塞戍守機宜史官言之詳矣然載籍汗漫搜討頗艱而邊  
荒文字殘缺士大夫家乘復不槩見倘使經制碩畫有闕  
邑治與夫潛德幽光為國史所不載者一任其散逸放失  
邈不可稽將何以彙輯憲章維持政教耶余曰是不可以  
無志先是梁溪楊□蓉裳刺史官是邑與余同志曾經草  
創而苦未就緒適武威郭雪莊進士主是邑講席余就與  
謀之雪莊曰公是舉誠勝事某當竭力成之但采集未備  
或苦疎漏奈何余曰何傷哉自古作述之盛率非獨見所  
成如班馬二史馬既本春秋國語世本諸書而班復因馬

補綴整齊又皆父子相承續成厥事至范蔚宗書又因漢官儀東觀記及謝承諸本始集大成然則美備相因後先相待自然之勢也今蓉裳刺史之所草創未就而有待於余者余既為纂成之矣假使後之君子或有蒐羅完富足以補是書所未及者不妨更修飾潤色增成巨觀此余抑亦蓉裳之所樂也其又何嫌焉於是酌定□  
列書成凡二百餘版余乃捐俸付梓□  
書其末以見夫舉墜修廢未嘗□  
如此

靈州誌蹟

跋

二

昔嘉慶三年歲次戊午

署靈州知州臯蘭縣知縣長白□□

